

1 JON

Jon Mij Ned Ak Tikak

Takaw pel midep ak misen lup

¹ Man alwol gılak ñin ak, Takaw pel midep ak yek. Pen ne anib ñin awl apıl, takaw agek timud chin ke niñid, widin chin ke niñid, ñin midup chin ke ak nop diniginok. Takaw pel midep anib ak, binib kilop agñibun. ² Bi gek binib pel pelnep yenigabal anib ak, ne Nap ayip midil, binib pel pelnep yelan agil owak. Misen apek niñid, nibop agñobun. ³ Nop widin niñid, takaw nop ak niñid dil, nibop agñibun ak nim, nib ayip jimñil midobun. Pen chin midupsek Bapi ayip, Ñine Jisas Klays ayip, apılmañal jimñil midil, jıj nokom midobun. ⁴ Chin anigil midon, chinop tep yibil ginimun agil, mij awl tikobun.

Milek adek ak ajonigun

⁵ Klays chinop agñek niginok takaw ak, nibop agñinigobun. God milek yibil mideb, kisilim sek ma mideb. ⁶ Anib ak chin tap si tap timel gi midilig, God ayip jimñil midobun aginigabun ak, kisilim nab okok midil, yepis adek ak gi dad amilig, anib aginigabun. ⁷ Pen God ayip midil, milek nop

1:1 Jon 1.1-4, 1.14, 20.27, 2 Pi 1.16, 1 Jo 2.13-14 **1:2** Jon 1.14, 21.24, Apo 2.32, Lom 16.26 **1:3** Jon 17.21, Apo 4.20, 1 Ko 1.9, 1 Jo 2.24 **1:4** Jon 15.11, 16.24, 2 Jo 12 **1:5** Jon 1.9, 9.5, 12.35-36, 1 Ti 6.16, Jem 1.17, 1 Jo 3.11 **1:6** 2 Ko 6.14, 1 Jo 2.4 **1:7** Ais 2.5, Jon 3.21, Epe 1.7, Hib 9.14, 1 Pi 1.19, Lep 1.5, 7.14

adek ak ajil binib ne ayip jimñil midon, Ñine Jisas chinop gos niñid nikim ne sogek kumak ak, ne gach chinop midupsek wik yokilig nep mideb. ⁸ Chin pen aginigabun, Tap si tap timel oginap ma gipun agonigabun, gos chin anep niñid yepis agil, takaw niñid yibil ak ma nig dipun. ⁹ Chin pen tap si tap timel gipun okok agyikonigabun, God ne bi sunjtep mideb tek, tap timel gipim okok tig walig giyokinigayn agak tek ginigab. Tap timel anib okok midupsek wik yokinigab. ¹⁰ Pen tap si tap timel ma nep gipun agonigabun, God ne bi takaw yepis agep olap mideb aginigabun. Anib ak takaw nop ak nig dinigun tek ma linigab.

2

Klays chinop yimug niñid, Nap nop agnigilig mideb

¹ Napay yad okok. Nibop mij tikebin anib ak, tap si tap timel ma ginimib agil tikebin. Pen tap si tap timel genigabim, Jisas Klays chinop yimug niñid, Nap nop agnigilig nep aginigab, Tap si tap timel gipal ak, tig walig giyokinimin aginigab. Jisas ne bi sunjtep mideb. ² Ne chinop nen kumak nim, Nap tap si tap timel gipun ak, tig walig giyokinigab. Pen chinop nep mel, binib okok midupsek kilop nen kumak nim, Nap tap si tap timel gipal ak, tig walig giyokinigab.

³ Chin God agup tek midil nim, nop gos nopun ak, nigtep gipun. ⁴ Binib oginap kili apal, God nop

1:8 Jop 9.2, Sng 32.5, Snd 28.13, Jem 3.2, 1 Jo 2.4 **1:9** Sng 51.2, Snd 28.13, 1 Jo 1.7 **1:10** 1 Jo 1.8 **2:1** Lom 8.34, 1 Ti 2.5, Hib 7.25, 9.24 **2:2** Jon 1.29, 11.52, Lom 3.25, 2 Ko 5.18, Kol 1.20, 1 Jo 4.10, 4.14 **2:4** 1 Jo 1.6-8, 4.20

nigtep gil dipun apal ak pen, agup tek ma gipal ak, yepis yibil apal. Binib anib okok, kili takaw ninid yibil ninid ma apal. ⁵ Binib pen God agup tek kidek gipal okok, kili nigtep gil God nop mapen lil midebal. Anib ak tek kili nepal, God ayip jimnil midebal. ⁶ Binib oginap kili anib apal, Chin God ayip jimnil midobun apal, Klays ne gup tek nep ginigel. ⁷ Binib mapen yad Klays yil midebin okok. Takaw kil tikil agebin anib ak, takaw kideyil tek lup ak pen, takaw ned nibi dipek ak nibop tikil agebin. ⁸ Pen takaw nibop agebin anib ak, abe takaw kideyil tek lup. Takaw ninid yibil anib ak, Klays yil ayip midil, nib ayip midil gup. Taynen? Kisilim bad ak kul ginigeb, milek ninid yibil ak minil mideb. ⁹ Binib kili God milek nop dil binib ne yibil midobun agil gos nepal ak pen, mam oginap kilop milik nepal okok, kisilim nab ayan midebal. ¹⁰ Binib mam okok kilop mapen lipal okok, God milek tep adek ak midebal. Milek adek ak midil, tap olap gek kili ma apyap pakinigabal. ¹¹ Pen binib mam okok kilop milik niginigabal okok, kisilim nab ayan midil, punil aplan apyan gilig, amobun migan ak agil ma nepal. Kili kisilim nab ayan midel, widin kilop koy gup.

¹² Nibi ñapay yad okok. Klays ne gitep gek, Nap nibop tap si tap timel gipim ak tig walig giyokek nim, nibop mij tikebin.

2:5 Jon 13.15, 14.21-23, 15.4-5, 1 Pi 2.21, 1 Jo 4.12-13, 4.17, 5.3 **2:7**
 1 Jo 2.24, 3.11, 2 Jo 5-6 **2:8** Jon 1.9, 8.12, 13.34, Lom 13.12, Epe
 5.8, 1 Te 5.5, 5.8 **2:9** 1 Ko 13.2, 2 Pi 1.9, 1 Jo 3.10, 3.14-15, 4.20
2:10 Jon 11.9, Lom 14.13, 2 Pi 1.10, 1 Jo 3.14 **2:11** Jon 11.10,
 12.35 **2:12** Luk 24.47, Apo 4.12, 13.38, 1 Ko 6.11, 1 Jo 1.7

¹³ Nibi biawl okok, bi ned man alwol gilek ak nop nepim tek, nibop mij tikebin.

Nibi bi pilaj okok, bi kicheki biawl ak ayip kiles gil penpen gipim tek, nibop mij tikebin.

¹⁴ Nibi ñapay yad okok, Bapi God nop nepim ak nim, nibop mij tikebin.

Nibi biawl okok, bi ned man alwol gilek ak nop nepim tek, nibop mij tikebin.

Nibi bi pilaj okok, kiles midil God takaw ak chichik timel dil, bi kicheki biawl ak ayip kiles gil penpen gipim tek, nibop mij tikebin.

Tap lum awl yil ak gos ma niginimib

¹⁵ Binib lum awl yil ak gos niñid gipal ak sek, tap lum awl yil ak sek gos ma niginimib. Gos nibi tap lum awl yil ak am komkam gek, God nop mapen ma lipim. ¹⁶ Binib tap midupsek lum awl yil gos nepal okok, mapen ke tikjakup tek gil, widin niñid gos timel owup tek gil, yib awl dinigun agil nepal tek gel amub. Nap ne kilop gos ñek anib ma gipal, gos kili ke niñid adek anib ak gel amub. ¹⁷ Tap gos lipigup anib okok, pisnep kul ginigeb ak pen, binib God gos nigup tek kidek gipal okok, pel pelnep yenigabal.

Binib Klays nop diyokil tep ne anib ak yad din apal okok, kili opal

¹⁸ Ñapay yad okok. Ñin kidek ak wulep mideb. Bi Klays nop diyokil tep ne anib ak yad din agek, biawl tek lek apeb ak, takaw agilak anib ak nepim.

2:13 1 Jo 1.1 **2:14** Epe 6.10 **2:15** Mat 6.24, Lom 8.7, 12.2, Gal 1.10 **2:16** Lom 13.14, Jem 4.16, 1 Pi 2.11 **2:17** Mat 7.21, 1 Ko 7.31, Jem 1.10, 1 Pi 1.24 **2:18** Mat 24.5, 24.24, 2 Te 2.3, 1 Ti 4.1, Hib 1.2, 1 Pi 4.7, 2 Pi 2.1, 2 Jo 7

Miñil pen binib Klays nop diyokil tep ne anib ak yad din apal okok, kuñay opal, anib ak tek chin nopun, ñin kidek ak wulep mideb. ¹⁹ Binib Klays nop diyokil tep ne anib ak yad din apal anib okok, binib chin yil midebilap tek, chinop keligil keke ma abilap. Anigil kelig keke amnilak tek, chin nopun, kili binib chin yil ma midebal. ²⁰ God Kawnan ne ak pen apil nib ayip midakniñ, nibi midupsek takaw niñid yibil ak nig dipim. ²¹ Takaw niñid yibil ak niginimib agil mij awl ma tikebin, nepim tek nibop tikebin. Nib nepim, God takaw niñid yibil ayip, takaw yepis okok ayip di wilik malik ma gep. ²² Binib an tek takaw yepis apal? Binib apal, Jisas ne Klays mel, bi yokip olap apal, kili binib yepis apal okok midebal. Kili Klays nop diyokil tep ne anib ak yad din apal binib okok midebal. Nap ayip, Ñine ayip kilop keligil nim, anigil apal. ²³ Ñine nop keligipal okok, Nap nop abe keligipal. Binib pen Ñine ak ne Klays apal okok, Nap nop abe dipal.

God Kawnan ne ak chinop takaw niñid ak agñub

²⁴ Anib ak, takaw ned nepek ak, ditep gilig yenimib. Midil nim, Nap ayip Ñine ayip, apilmijañ ayip jimñil yenigabim. ²⁵ Kili apilmijañ ayip jimñil midil nim, Klays binib ne dup okok pel pelnep yenigabal agak tek, nibop ginigab.

²⁶ Binib nibop takaw yepis agebal okok, kili agel gi dad amek apyap pakinimib tek lup ak niñid,

2:19 Mat 24.24, Jon 6.37, Apo 20.30, 1 Ko 11.19 **2:20** Jon 10.4, Apo 3.14, 1 Ko 2.15, 2 Ko 1.21, Hib 1.9, 1 Jo 2.27 **2:22** 1 Jo 4.3, 2 Jo 7 **2:23** Jon 5.23, 14.7-10, 15.23, 1 Jo 4.15, 5.1, 2 Jo 9 **2:24** Jon 14.23, 1 Jo 1.3, 2 Jo 6 **2:25** Jon 3.15, 6.40, 17.3, 1 Jo 1.2, 5.11

nibop mij awl tikebin. ²⁷ Pen takaw kunjay ma agñinigayn. Klays ne God Kawnan ne ak agyokek apil nib ayip kod mideb. God Kawnan ne ayip midebim ak nim, ne ke nibop gos yipid gil adek ak ñek, nigtep gipim. Takaw yepis adek okok gos ak ma ñub. Yipid gil gos ñek nepim. Anib ak God Kawnan ne ak gos ñub tek, Klays nop chigil nep yenimib.

God ñapay ne midobun

²⁸ Pen miñil Klays nop chigil nep yenimib. Ñapay yad okok, nibi nop chigil nep midem nim, ne adikid misen ownigab ñin ak, nop nigon neben ma gek, gos sek yonigabun. ²⁹ Nib nepim, Klays ne suntep midil, yipid gil adek ak nep gup. Anib ak abe nepim, binib kili suntep midil yipid gil adek ak gipal okok, God ñapay ne yibil midebal.

3

¹ God chinop mapen yibil lil agup, Nibi ñapay yad midebim agup. Niñid yibil, chin God ñapay ne midobun. Pen binib lum awl yil okok, kili chinop nigtep ma gipal. Bapi chin ak nop nigtep ma gilak, anib ak tek chinop nigtep ma gipal. ² Pen binib mapen yad okok nigim. Chin miñil God ñapay ne midil, kidek titay tek yonigabun ak nigtep ma gipun. Nigtep ma gipun ak pen, Klays ne apil misen lak ñin ak, nop niñid, chin ke yibil lil ne mideb tek ak yonigabun. ³ Binib gos anib ak nepal okok, kili

2:27 Jon 14.26, 16.13, Hib 8.10-11, 1 Jo 2.20 **2:28** 1 Jo 3.2, 4.17

2:29 Apo 22.14, 1 Jo 3.7, 3.10 **3:1** Jon 1.12, 3.16, 16.3, Lom 8.16, 1 Jo 4.10 **3:2** Lom 8.18, 8.29, 1 Ko 15.49, 2 Ko 3.18, Plp 3.21, Kol 3.4, 2 Pi 1.4

nop kod midil, ne gach sek ma yek tek yonigun agil, tap si tap timel okok keligil gach sek ma midebal.

⁴ Binib tap si tap timel gipal okok, God takaw ak tibilikipal. Tap si tap timel ak anib ke mel, nim ak takaw ne tibilikipal ak nep. ⁵ Pen nib nepim, Jisas tap si tap timel gipal okok tig walig giyokinig owak. Pen ne tap si tap timel ma yibil gak. ⁶ Binib Klays nop chig tep gil midebal okok, tap si tap timel gilig ma midebal. Binib tap si tap timel gilig midebal okok, kili nop widin ma ninid, ne bi tay tek mideb ak ma nepal.

⁷ Ñapay tep yad okok. Bi oginap yepis agil, nibop ag lipig dad amnigel tek linigab ak, nigtep ginimib. Binib gitep gipal okok, kili Klays suntep mideb tek midebal. ⁸ Pen binib tap si tap timel gilig midebal okok, kicheki biawl ak kilop bak lek, kili ne tap si tap timel bilel nib pel gup tek gilig midebal. Adek anib ak nep, God Ñine owak. Ne Satan binib okok kilop pel gi timel gup ak, pisnep tibilik yokinig owak. ⁹ Binib God ñapay ne midebal okok, ne kilop gitep gil kod midakniñ, tap si tap timel okok asik tep gipal. Ne mideb tek midil, tap si tap timel gilig yenigel tek ma lup. ¹⁰ Anib ak tek binib an God ñapay ne midebal akan, an Satan ñapay ne midebal ak, nigtep gipun. Binib gitep ma gil, mam okok kilop mapen ma lipal okok, God ñapay ne ma midebal.

3:4 Lom 4.15, 1 Jo 5.17 **3:5** Ais 53.5-6, 53.11, Jon 1.29, 2 Ko 5.21, 1 Ti 1.15, Hib 4.15, 1 Pi 2.22-24, 1 Jo 2.2 **3:6** Lom 6.1-2, 6.14, 1 Jo 2.4, 3.9, 4.8, 3 Jo 11 **3:7** Lom 2.13, 1 Jo 2.26, 2.29 **3:8** Stt 3.15, Luk 10.18, Jon 8.44, 16.11, Hib 2.14 **3:9** 1 Pi 1.23, 1 Jo 5.18 **3:10** 1 Jo 2.29, 4.8

Mam ay God yil midebal okok, kilop mapen linimib

¹¹ Pen takaw anib ak ned nibop aginok tek, mam ay okok kilop mapen linimib. ¹² Adam ñine Kein gak tek ma ginimib. Ne Satan yil midil, nimam kidek gitep gak ak nop milik niñid, pisnep paklek kumak. Taynen nop paklak? Kein gos timel niñid pel gi timel goligup, nimam kidek gos tep niñid pel yipid gil goligup. ¹³ Anib ak mam ay yad okok. Binib lum awl yil ak nibop nigel milik yownigab ak, gos kuñay ma niginimib. ¹⁴ Chin mam ay okok kilop mapen lipun tek nopun, God chinop dek, pisnep kubal kid ak keligil, pel pelnep yenigabal kid ak midobun. Binib mapen ma lipal okok, pisnep kubal kid ak midebal. ¹⁵ Binib mam oginap kilop milik niñid gos anib ak nepal okok, binib chip ñapal tek lup midebal. Pen nib nepim, binib chip ñapal okok kili titay dinigabal? Pel pelnep ma yenigabal. ¹⁶ Jisas Klays chinop nen kumak. Kumek, chin binib oginap kilop mapen lep jij ak nopun. Anib ak tek, gos chin ke nep niñid midtep ginigun agil ma niginigun. Mam ay okok kilop gos niñid, midtep ginigel agil kilop gitep ginigun. ¹⁷ Binib tap kuñay midilig, mam ay tap ma mideb okok kilop niñid chib ma nepal ak, God binib kilop mapen lup tek ma gipal. ¹⁸ Anib ak ñapay yad okok. Takaw nep ma aginigun, mam ay okok kilop ditep

3:11 Jon 13.34, 15.12, 1 Jo 1.5, 4.7, 4.21 **3:12** Stt 4.8, Hib 11.4, Jud 11 **3:13** Mat 5.11-12, Jon 15.18-19, 17.14, 2 Ti 3.12 **3:14** Jon 5.24, 1 Jo 2.9-11 **3:15** Mat 5.21-22, Gal 5.21, Lep 21.8 **3:16** Jon 3.16, 13.1, 15.13, Lom 5.8, Gal 1.4, Epe 5.2, 5.25, 1 Te 2.8 **3:17** Lo 15.7, Luk 3.11, 1 Jo 4.20 **3:18** Lom 12.9, Jem 2.15-16, 1 Pi 1.22

yibil gil mapen yibil linigun.

Binib God nop chigipal okok, kili gos sek midebal

¹⁹ Chin binib okok kilop mapen yibil lipun ak nim, chin nopun, takaw niñid yibil ak ditep gipun. Anigon, gos chin nab ayañ midtep gil, gos pal awl ma lipun. God widin midup adek ak nebeñ ma dil, gos sek midobun. ²⁰ God gos ne gos awl yibil, gos chin ak sikol olap mideb. Gos chinop okok midupsek nigup. Anib ak tek, gos chin nab ayañ chinop ke ag ginimun tek lup won ak, gek gos pal awl ma linigun. ²¹ Anib ak binib mapen yad okok nigim. Gos chin nab ayañ gek gos pal awl ma lipun ak, God widin midup adek ak ñawl ma dil, gos sek midobun. ²² Takaw ne agak tek kidek gilig gitep gipun, anib ak tek nop agnopun ak, tep gakniñ apun tek gup. ²³ Pen chinop agak tek ak anigil mideb. Ñine Jisas Klays nop gos liniñid, mam ay okok kilop mapen linigun. ²⁴ Binib ne agak tek gipal okok, ne kili ayip jimñil mideb, kili pen ne ayip jimñil midebal. Kawnan ne ak agyokek apil chin ayip midobun, anib ak chin nopun, ne ayip jimñil midobun.

4

God Kawnan ne ak gos ñub ak akañ, kawnan yokip ak gos ñub?

3:19 Jon 18.37, 1 Jo 1.8 **3:21** Hib 4.16, 10.22, 1 Jo 2.28, 4.17
3:22 Sng 34.15, Jer 29.12, Mat 7.8, 21.22, Jon 9.31, 14.13 **3:23**
Jon 6.29, 13.34, 15.12, 15.17, 17.3, 1 Te 4.9, 1 Pi 4.8, 1 Jo 2.8-10 **3:24**
Jon 14.23, 15.10, 17.21, Lom 8.9, 1 Jo 4.12-13

¹ Binib mapen yad okok. Bi kili God takaw agobun agil, yepis agil ajipal okok, kili kunjay midebal. Anib ak tek binib oginap God Kawnan ayip midobun agenigel, nigtep gil takaw kilop ak dinimib. God Kawnan ayip midobun apal ak pen, God Kawnan ne ak yipid gil akan, kawnan yokip ak kilop gos ñek agebal akan agil niginimib. ² Pen God Kawnan ne ak ayip midil, kili aginigabal, Jisas Klays, ne bi yibil lil lum awl owak aginigabal. ³ Pen Jisas bi yibil lil ma owak aginigabal ak, God Kawnan ne ak ayip ma midebal. Bi Klays nop diyokil tep ne anib ak yad din agup ak, kili gos ne ak dil, takaw anib ak tek apal. Bi anib ak ownigab agel nepek ak, miñil apil lum awl mideb.

⁴ Ñapay yad okok. Nibi God binib ne midebim tek, takaw yepis kili apal ak, taw jisipuk gipim. God Kawnan ne ak nab nibi pi ak jimñil mideb ak, Kawnan kiles timel yibil. Tap olap nab kili pi ak jimñil mideb ak, ne kiles ma mideb. ⁵ Binib anib okok lum awl yil. Takaw kili abe lum awl yil ak nim, binib lum awl yil ak takaw kili anib ak nig dipal. ⁶ Chin pen God yil midobun tek, binib God nop nepal okok, kili takaw apun ak nig dipal. Binib nop ma nepal okok pen, takaw apun ak ma nig dipal. Anib ak tek, God Kawnan ayip midil takaw niñid yibil won ak apal akan, kawnan yokip gos ñek takaw yepis won ak apal ak nopun.

4:1 Mat 7.15, 24.4-5, 24.24, 1 Te 5.21, 2 Pi 2.1, 1 Jo 2.18, 2 Jo 7, Lep 2.2 **4:2** 1 Ko 12.3, 1 Jo 5.1 **4:3** 2 Te 2.7, 1 Jo 2.18, 2.22, 2 Jo 7
4:4 Mat 12.29, Jon 16.33, 1 Ko 2.12, Epe 2.2, 6.12, 1 Jo 5.4-5 **4:5** Jon 3.31, 15.19, 17.14 **4:6** Jon 8.47, 10.27, 14.17, 1 Ko 14.37, 2 Ko 10.7

God chinop mapen lup tek, chin anib ak nep mam ay okok kilop mapen linigun

⁷ Binib mapen yad okok. God chinop mapen lup tek, chin anib nep penpen mapen linigun. Binib mapen lipal okok, kili God nop nigtep gil, ñapay ne midebal. ⁸ God pelpel binib okok midupsek mapen lup. Anib ak tek binib kili binib oginap kilop mapen ma lipal okok, God nop ma nepal. ⁹ God Ñine nokom agyokek lum awl owak. Anigek, chin pelpel yonigabun. Anigup ak chin nopun, God chinop mapen lup. ¹⁰ Mapen lep adek ak, chin kid yil ak ma tikjakak, God kid yil ak tikjakak. Chinop mapen lil, Ñine nop agyokek apil, tap si tap timel gipun okok tig walig giyokinig owak.

¹¹ Binib mapen yad okok. Ne chinop anigil mapen lup, anib ak tek chin abe penpen mapen linigun. ¹² God nop misen ma nopun ak pen, penpen mapen lipun ak, ne chin ayip jimñil midakniñ gipun. Ne chin ayip jimñil mideb ak nim, ne binib mapen yibil lup tek gipun.

¹³ God Kawnan ne ak agyokek apil, chin ayip jimñil mideb ak nim, Kawnan ne ak chinop ñek ne ayip jimñil midobun ak nigtep gipun. ¹⁴ Nap Ñine bi kasin gep ak midonimun agil, nop agyokek apek, widin chin ke niginok. Niñid, Nap ne binib lum awl ak midupsek kilop gos niñid agyokak agil, nigtep gil binib kilop agñibun. ¹⁵ Binib misen apal, Jisas

4:7 1 Jo 2.29, 3.10-11, 3.23 **4:8** 1 Jo 2.4, 3.6, 4.16 **4:9** Jon 3.16, Lom 5.8, 8.32, 1 Jo 5.11 **4:10** Jon 15.16, Lom 5.8-10, Tat 3.4, 1 Jo 2.2 **4:11** Mat 18.33, Jon 15.12-13, 1 Jo 3.16 **4:12** Jon 1.18, 1 Ti 6.16, 1 Jo 2.5-6, 4.18-20 **4:13** Jon 14.20, 2 Ko 1.22, 1 Jo 3.24
4:14 Jon 1.14, 3.17, 1 Jo 1.1-2 **4:15** Lom 10.9, 1 Jo 5.1, 5.5

ne God Ñine yibil mideb apal okok, God kili ayip jimñil midakniñ, kili pen God ayip jimñil midebal. ¹⁶ Chin ke God chinop mapen lup ak nigtep gil, adek anib ak gon ameb.

God bi mapen lep. Binib kili God ayip mam ay oginap ayip kilop mapen lipal okok, God ayip jimñil midebal, ne kili ayip jimñil mideb. ¹⁷ God chin ayip jimñil mideb ak nim, ne binib mapen lup tek gipun. Anib ak kot awl ginigab ñin ak niñid gos sek midon jel ma gup. Chin lum awl midobun ak pen, Klays mideb tek midon jel ma gup. ¹⁸ Binib penpen mapen lipal okok, tap olap nigel jel gek ma pilikipal. Anib ak tek, binib God ayip penpen mapen yibil lipal okok, pilikinigel tek ma yibil lup. Pen binib kili God nop mapen ma lil, binib okok kilop abe mapen ma lil, pilikipal. Taynen? Kili nepal, yul awl ak dinigabal. ¹⁹ God ne ned chinop mapen lup ak nim, God nop mapen lil, binib okok kilop mapen lipun. ²⁰ Binib God nop mapen lipun apal ak pen, mam ay okok kilop milik nepal ak, yepis yibil apal. Mam ay okok kilop widin nepal, God nop widin ma nepal. Anib ak, kili mam ay oginap kilop mapen ma lipal, titay dil God nop mapen lipal? ²¹ God ne chinop kiles gil agak, Binib yip mapen lipal okok, mam ay okok kilop abe mapen linigel agak.

5

Binib Jisas nop gos linepal okok, tap lum awl yil ak taw jisipuk gipal

4:16 1 Jo 3.24, 4.8, 4.12

4:20 1 Jo 2.4, 3.17, 4.12

13.34, 15.12, 1 Jo 3.23

4:17 Jem 2.13, 1 Jo 2.28, 3.3, 3.19-21

4:21 Mat 5.44-45, Mak 12.29-31, Jon

1 Binib kili Jisas ne Bi God nop aglup ak agil gos linepal okok, God ñapay ne midebal. Nap nop mapen lil, ñapay ne okok kilop abe mapen lil gipal. 2 Pen chin God nop mapen lil, agak tek kidek gipun ak, chin nopun, ñapay ne okok kilop mapen lipun. 3 God nop mapen lil nim, agak tek kidek gipun. Pen takaw ne agak anib ak, miñel ma gup. 4 God nop gos linigon, chinop dek ñapay ne midobun ak, tap lum awl yil ak midupsek taw jisipuk gipun. Gos chinop ak ma ap lipig dad amñigab. 5 Binib an tap lum awl yil ak midupsek taw jisipuk gipal? Binib Jisas ne God Ñine agil gos linepal okok, kili nim anigipal.

God Ñine takaw nop ak misen agup

6 Jisas Klays owak ak, bi yokip ma owak. Ñig pakak, kidek mab bak alañ nikim sogek kumak. Ñig nep pakek, God Ñine mideb agil ma apun. Ñig pakek kidek mab bak alañ nikim sogek kumak ak, God Ñine mideb agil nopun. God Kawnan ne ak takaw jij niñid yibil ak, ne Jisas Klays takaw nop ak misen agup. 7 Anib ak takaw adek omiñal nokom mideb, 8 Jisas ne ñig pakak ak, mab bak alañ nikim ne sogak ak, God Kawnan ne ak takaw misen agak ak. Takaw omiñal nokom anib ak, jimñil adek nokom agup anib ak tek, Jisas God Ñine nokom mideb ak nigtep gipun. 9 Binib okok agel nopun

5:1 Jon 1.12-13, 15.23, 1 Jo 2.22-23, 4.15 5:3 Mai 6.8, Mat 11.30, Jon 14.15, 14.21-24, 2 Jo 6 5:4 Jon 16.33, 1 Jo 3.9, 4.4 5:5 Lom 8.37, 1 Ko 15.57, 1 Jo 4.4, 4.15 5:6 Jon 1.29, 1.34, 14.17, 16.13, 19.34, 1 Ti 3.16, 1 Jo 1.7 5:7 Jon 1.1, 10.30, Lep 19.13 5:8 Jon 15.26 5:9 Mat 3.16-17, 17.5, Jon 5.32-37, 8.17-18

ak, takaw nep agel nig dipun. God ne pen Ñine takaw nop ak chinop agup ak, takaw ninid yibil agek nig dipun. ¹⁰ Binib God Ñine nop gos linepal okok, God ayip midil, God takaw misen agup ak nig dipal. Binib pen God takaw agup anib ak ninid ma dipal okok, God bi yepis agup agil nepal. Taynen? God ne Ñine takaw nop ak misen agup ak, kili ninid ma dipal. ¹¹ God ne Ñine nop agyokek apil chinop gek, pel pelnep yonigun. Chin ninid anib ak nopun, God takaw ne misen agup ak, takaw ninid yibil mideb. ¹² Binib God Ñine nop dipal okok, miñil midtep gil pel pelnep yenigabal. Pen God Ñine nop ma dipal okok, miñil midtep ma gil, pel pelnep ma yenigabal.

Chin nopun, pel pelnep yonigabun

¹³ Nibi God Ñine nop gos linepim okok, pel pelnep yenigabim ak nigtep ginimib agil, mij awl tikebin. ¹⁴ God gos ne ke nigup ak ninid agnopun ak, agnopun tek nep nigup. Anib ak tek God yil monmon apil nop agnopun. ¹⁵ Pen chin nopun, God nop agnopun ak, tap agnopun anib okok midupsek ne nigup. Anib ak tek, chin tap olap nop agnigon, tap anib ak ginigab.

¹⁶ Pen mam olap tap si tap timel gek ninid, God nop agniginimib. Agnigem, nop tep ak dek, ne ayip jimñil yenigab. Pen tap si tap timel olap gonimun, kawnan ne pisnep kumeb tek mideb ak, God nop gitep gan agil agniginimib ma agebin. ¹⁷ God tap

5:10 Jon 3.33, 5.38, Lom 8.16, Gal 4.6 **5:11** Jon 3.36 **5:12** Jon 3.36, 5.24 **5:13** Jon 20.31, 1 Jo 1.1-2 **5:14** Jon 14.13, 16.23, 1 Jo 3.21-22 **5:16** Mat 12.31-32, Luk 12.10, Hib 6.4-6, Jem 5.14-15

mel agak okok gipal ak, tap si tap timel gipal. Pen tap timel anib okok gipal, kawnan kili pisnep kumeb tek ma mideb. Tap nokom olap gipal ak, kawnan kili ak pisnep kumeb tek mideb.

¹⁸ Chin nopun, binib God ñapay ne midebal okok, tap si tap timel gilig ma midebal. God Ñine kilop kod midakniñ, Satan kilop dinimun tek ma lup.

¹⁹ Chin nopun, binib lum awl yil okok midupsek Satan yil midebal ak pen, chin God yil midil ñapay ne midobun. ²⁰ Pen chin nopun, God Ñine apil, chinop gos tep ñek, God ne bi yipid gil mideb ak nop nigtep gipun. Chin God bi yipid gil mideb ak ayip jimñil yibil midil, Ñine Jisas Klays ayip abe jimñil midobun. Jisas Klays nim, ne God bi yipid gil mideb. Ne chinop gek, pel pelnep yonigabun.

²¹ Ñapay yad okok. Tap yepis god chin agil agnepal okok, asik tep ginimib.

5:18 Jon 17.15, Jem 1.27, 1 Pi 1.23, 1 Jo 3.9 **5:19** Lom 8.10, 8.23, Gal 1.4, 1 Jo 4.6 **5:20** Ais 9.6, Mat 25.46, Jon 17.3, 1 Ti 3.16, Hib 1.8 **5:21** 1 Ko 10.14

Jisas Klays Takaw Teplep Ne Tay New Testament

copyright © 2013 Pioneer Bible Translators

Language: Tay (Tai)

Translation by: Pioneer Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-06-21

PDF generated using Haiola and XeLaTeX on 11 Nov 2022 from source files dated 29 Jan 2022

24d09cce-9a93-523a-afa5-7b091c264cee